

PASQUA 2014



Un saluto e tanti Auguri, cari amici : Buona Pasqua !

don Arnaldo

L'è Pasqua: din, don, dan
Sona a distesa tut' i campan.
A gh'è in gir un'aria de festa
Che me stordiss el coeur e la testa
Sarà 'l fiori de la primavera
Che dent me canta mattina e sera?

No, car amis: l'è 'n quaicoss de pussé bel
Che te toca 'l coeur e 'l cervell
L'è 'na promessa che m'ha faa 'l Signor
D'ona vita vera e piena d'amor.
Ma no 'na promessa fada a parol
Che giren a voeui senza control!
'Na promessa fada d'on quaicoss
Ch'è sucedu là 'n d'on bel post.

Ve cunti su come l'è 'ndada:
Gh'era 'na tomba ben sigilada
A Gerusalem in d'ona contrada
G'han miss la guardia, fin a curala.

Ma quand i donn in andaa de corsa
La matina bonora coi profum dent la borsa
L'han trovada 'verta e gh'era pu
El so Signor, el bon Gesù.
Eren sicur d'avel compost
Do ser prima, apena mort
Vongiù e faa su on po de pressa
Perché cominciava già la gran festa.
E 'l dì de festa, come se sa,
L'è proibì ogni laorà.
Adess, invece, du bei gioinott
Staven setaa in su la tomba
Vun de pee, l'alter de co.
Eren content, vesti de la festa
E ai donn, tutt stremii, ghe girava la testa.
Diseven soridend " Car i me donn, in mezz i mort
S'i vegnu a cercal Lu, che l'è viv e risort?
Andée in Galilea, se vorì vedel
Provarì de persona come l'è bel!"
Vuna de lor, la Madalena,
L'è tornada indré tuta de pressa
Per digh ai so amis la roba sucessa.
"Ma va là - ghe diseven - te se insognada!"
Ma poeu de corsa han fa tuta la strada.
La Madalena l'è 'ndada insema a lor
Tuta in gran pena a cercaa 'l so Signor.
E la piangeva là in de l'ort
Quand l'ha vist Vun on po de stort
Ch'el stava lì bel drizz in pée.
Le l'ha ciapaa per el giardinée.
Lu 'l ghe diseva: "Mia cara dona: che gran magon!
S' te ghe de piang lì 'n d'on canton?"
"In doe t'è miss el me Signor?"
La ghe dis le cont'on gran strozon.
"Mi vo a cercal anca in co del mond!"
Lu l'ha guardada con gran tenerezza
E cont'ona vos che pareva 'na carezza
L'ha ciamada per nom, prima de 'ndà via
L'ha ciamada bel ciar e l'ha dì: "Maria!"
Lee l'ha capii pu nient, el coeur ghe sciupava
E l'ha cercaa de dag 'na brasciada.
Lu l'g'ha dì: "Dess tegnom no. L'è no 'l moment.
Va putost a dighel a tuta la gent!"

E l'è staa inscì che : dighel a quest, dighel a quel
La gran noità l'ha fa 'l gir del mond
Che l'è pu 'me prima: l'è pussé bell!

Gh'è staa 'n quaivun (chissà quant caminàa!)
Che fin chi l'ha portaa la gran noità.
L'han sentuda anca mia mama e 'l me papà
Ghe l'aveven di i so genitor
E mi l'ho imparada propi de lor.
E adess ve 'l disi anca a vialter
Perché gh'el disi a tucc i alter.
L'è propi quest che me fa content
Content 'me 'na Pasqua, mia cara gent!

Pensàa: gh'è 'nmò chi ch'el dis
Ch'è vegnu nissun del Paradis
A cuntam su 'me la sarà
La vita eterna, quella de là.


E invece l'è propi inscì:
Lu l'era mort, mort e sepelii.
Ma l'è torna chi per menam a caa!
A casa sua gh'è tanti post
L'ha di propi Lu ai so amis:
Gh'è post per tuti in Paradis!
E ch'el me speta l'è 'l so Papà
Che l'è 'nca 'l noster, me l'ha di Lu:
Semm tucc fradei col bon Gesù!
Per mi e per ti là gh'è 'l noster post
Anche se fussom di grass de rost.
Basta che piangiom 'me la Madalena
E di noster pecaa sentom gran pena.
El bon Gesù 'l me vegn arent
E 'l me ciama ognun per nom
A vun a vun: nom e cognom!
Lu 'l me cognoss fin in fond
E 'l me 'bandona mai in sto pover mond.

Ecco la rason de tanta alegria:
Se sta volontera a festegià in compagnia.
E l'è per quest che - te sentet? -

DIN DON DAN...

SONEN A FESTA TUT'I CAMPAN !!!

“La Maddalena al Sepolcro”



(opera di Gioele, 5 anni!)